

崔舍人玉堂類藁

崔舍人玉堂類藁第卷十七

春端貼子

淳熙元年端午貼子詞

皇帝閣六首

五言

雙秀雲牟實三眠雪蘭豐無人知帝力渾在舜弦中

又

御柳垂波綠宮槐覆幄涼香風隨步輦偏到殿中央

又

采縷縈朱戶芳葩剪翠筒風光天上別景物世間同

七言 三首

千年桃印明金殿  
百子榴房照綺䟽  
清曉宮門放魚  
鑰內家催進恤刑書

又

幽芳拂拂朝香度  
密葉陰陰晝影圓  
玉食未應須角  
黍君王端是念忠賢

又

雙人綠艾消民沴  
五色朱絲奉帝齡  
向晚封章都閱  
遍翠輿初過水心亭

淳熙二年春貼子詞

光堯壽聖憲天體道太上皇帝開六首

五言 三首

嶰管今朝應璿杓昨夜旋耕桑三萬里一樣樂堯天

又

事已高超古心猶切爲民慈顏應有喜房宿正當晨

又

采栢浮仙醪凝酥點壽盤君王千萬歲長奉兩宮歡

七言 三首

九重雲氣鬱崔嵬日轉青旗瑞色開晨蹕一聲春又到  
太平天子上瑤盃

又

樓閣隔年餘舊雪園林連夜著新花東皇擬作行春  
計先到長生大帝家

又

景龍門上華燈動黃鵠池邊翠浪通一一春光須作  
主從今二十四番風

壽聖明慈太上皇后閣六首

五言 三首

玉甍和聲度金鋪麗景遲思齊文母聖春日受春祺

又

寶殿春朝退瑤池夜宴深明朝是人日時復問晴陰

又

翠輦西湖路雕盤北苑花時平無外事隨意趁年華

七言

三首

扇開雉影紅雲起簾卷蝦鬚畫燭明三十六宮齊進  
酒盤金小勝縷長生

又

日浴鳳沼搖波暖雲護龍樓倒影長讀罷黃庭無一  
事好風吹動百花香

又

院落韶光歸柳色郊原耕信到  
莧芽望春臺下□□  
軟不見游龍有外家

淳熙六年春貼子詞

皇帝閣六首

五言 三首

今歲韶光好時逢大有年  
條風方被物莧葉又催田

又

今歲韶光好年中兩見春  
餘寒九日在芳意一朝新

又

今歲韶光好田間氣象淳  
政平無橫賦粟賤少窮民

七言 三首

東風先滿殿前旗  
御柳宮花次第知  
連夜芳心相待  
發侵朝柔恩不勝垂

又

千門曉日山河麗  
萬國春風草木香  
造化無私隨發  
育聖明天子是東皇

又

彤庭清蹕轉輕雷  
鳳管吹春入仗來  
萬籟有聲皆善  
頌入荒無地不熙臺

皇后閣五首



五言 二首

何處春來早  
光風入九門  
未翻池荇翠  
先著壁椒溫

又

何處春來早  
坤儀物意熙  
煙生金屋重  
日上玉階遲

七言 三首

明朝嘉氣滿  
慈闈親侍君  
王獻玉卮一  
樣酥盤俱手  
製百般綵勝  
總春宜

又

風光天上倍  
常殊花壓闌  
干晝影舒虛  
几自臨中令  
帖明窻時展  
大家書

又

清明小苑條桑地和暖平川浴種天聖王儉勤游樂  
少只將敦朴示民先

淳熙六年端午貼子詞

皇帝閣六首

五言 三首

玉辇浮萸細金盤薦木香皇齡千萬壽高拱舜衣裳

又

蘭氣浮丹殿槐陰被紫宸薰琴多在御揮拂寄深仁

又

清曉開魚鑰紅雲縹緲間催裁恤刑詔傳放謝衣班

七言 三首

夜披章奏涼生扇午對臣鄰汗浹衣水閣風亭松竹  
邃翬輿臨幸日來稀

又

仁風長養羣生遂化日清明百沴驅桃印艾人消底  
用殿心高設敬天圖

又

避暑深宮消永晝函風廣殿起涼秋宸心未愜高明  
適志在山東二百州

皇后閣五首

五言 二首

剪玉菰筒翠盤金綵縷長宮中多燕喜天下正明昌

又

瑞麥登時物香蒲薦壽祺珠囊新樣小楚就葛覃詩

七言 三首

鬪草人歸午漏徐宮簾不動玉窻虛旋開藥笈尋仙  
典閑點松腴試法書

又

蠶館風清下落時六宮□從獻絲歸便教淵室催機

織要及明堂製衮衣

又

聖主恭勤少燕游生衣趁得未明求隨時但獻長生  
縷當午猶閑競渡舟

淳熙七年春貼子

光堯壽聖憲天體道性仁誠德經武緯文太  
上皇帝閣六首

五言 三首

欲識春回處長生大帝家萬年枝聳翠千歲果開花

又

欲識春回處君王獻壽時  
商雲扶寶座和氣入瑤卮  
又

欲識春回處晴峯俯碧泉  
巖巒猶積雪草木已生煙  
七言 三首

冰消宿沼悠揚動煙暖  
寒林約略青試上龍樓回遠  
望朝來生綠畫羅屏

又

聚景園中芳意換  
望湖樓下綠波長  
厖眉自識車音  
美時有綢繆夾道香

又

一氣暗隨鸞輅動萬祥給會袞衣朝康衢歌吹東風  
裏滿聽兒童善祝堯

壽聖齊明廣慈太上皇后閣六首

五言 三首

天上春光別東皇管領來初從旗氣轉旋逐蹕聲回

又

天上春光別融融物態宜彤庭花氣煖黃道日輪遲

又

天上春光別時康樂事繁煙花浮閬苑露葉簇金盤

七言 三首

蒼龍紫輦道春回盡把韶華入酒盃但見殿前移仗  
退已聞苑內奏花開

又

玉壓闌干日影長雲窻侍女畫焚香琅函自檢長生  
錄金管時書急就章

又

花邊破日紅千疊柳際勻煙翠一層閣盡風光長不  
老綠車當見從雲仍

淳熙七年端午貼子詞

皇帝閣六首



五言 三首

赤伏祥暉盛黃離治象亨天時四序正君德萬方明

又

采縷盤金麗香蒲鏤玉勻君王千萬壽歲歲樂茲辰

又

日御秋永雲峯疊疊繁宸心定忘暑長筭入中原

七言 三首

光浮水檻虛黃蓋涼滿冰臺待翠輿日轉槐龍天近  
午汗衣猶聽講筵書

又

松碧涵風清度曲梅黃過雨密留陰翠寒堂上全無  
暑定起人間扇暍心

又

黃道星辰移企翼青冥風露近飛簷翠華晚過凌虛  
殿一色明珠十二簾

皇后閣六首

五言 二首

玉燕垂符小珠囊結艾青更將長命縷侵曉奉慈庭  
又

厚德承三殿柔風被入絃欲知勤儉化當暑澣衣清

七言 三首

玉學浮苒追令節寶箱儲藥趁靈辰  
細開角黍詢前事應助吾皇念直臣

又

日永苕池閑畫舫風清蠶館入新絲  
內人鬪草歸能說今歲山中艾出遲

又

翠雲幕卷迎風殿零露盤高待月臺  
應上君王千萬壽霓裳吹下九天來

淳熙八年春貼子詞

太上皇帝閣六首

五言 三首

翠管吹寒去青旗卷仗來慈皇千萬壽春日  
上春孟

又

剪玉酥花細盤金綵勝宜六宮呈妙巧春日  
頌春祺

又

鳳苑開丹燕龍樓下翠華天工不敢住春日  
著春花

七言 三首

親提神器授今皇帝德王功日日昌萬宇熙  
臺無一事湖山好處賞風光

又

今歲東皇作意遲春朝  
恰近上元期長生宮殿花開  
了便放人間十萬枝

又

高蹈殊庭二十春  
隨時游樂爲同民  
翠輿黃傘西湖  
路老穉年年喜望塵

太上皇后閣六首

五言  
三首

春曉慈闈啓君王  
奏問安和聲調嶰管  
歡頌獻椒盤

又

春晝慈闈靜宮簾日上徐焚香開絲二典滴露寫仙書

又

春夕慈闈永瑤池樂未央管弦聲合奏燈月影交光

七言 三首

昨夜三更斗柄旋東風催放百花鮮飛來峯下溶新綠  
流得春光到外邊

又

鬱葱嘉氣滿蓬萊天子雙稱萬壽盃朝罷樂音迎複道  
瑤輿同上望春臺

又

有象并平屬好春九衢歌舞樂芳辰  
濯龍門外車如水應笑豪華漢外親

淳熙八年端午貼子詞

太上皇帝閣六首

五言 三首

待月長生殿迎風太液池  
慈顏歡樂日聖德盛明時

又

濯濯風涵柳英英露瀉荷  
微涼無限意分付舜弦歌

又

蓮葉看龜上桐花引鳳棲  
聖人千萬壽福祿與天齊

七言 三首

采索謾繁長命纓紫芽安用引年苴只將三紀休兵  
德聖壽宜同泰華長

又

了無塵累可關情坐見寰區樂太平弄水看花聊燕  
適倚松餐菊偶經行

又

竹殿陰陰間綠槐日長碁罷看流盃北窗風味沈沈  
靜南內時新節節來

太上皇后閣六首



五言 三首

拭黍團雲白  
菖花剪玉長  
晚涼新月上  
水殿按霓裳

又

海上千年寶峯頭  
十丈花年年當令節  
同獻玉皇家

又

翰墨消長日  
尊卑占遠風  
纖塵吹不到  
人在玉壺中

七言 三首

寶月驂鸞采結垂  
朝來新寫上皇詩  
金盤有露涼生  
早玉字無塵凍解遲

又

水晶宮闕淨涵虛歷歷南風度玉除金井轆轤聲欲  
曉內人來奏問安書

又

萬年枝下綠陰長拂石時來坐晚涼別殿笙歌催宴  
早千門鋪月靜焚香

崔舍人玉堂類藁卷第十七

崔舍人玉堂類藁卷第十八

致語口號

樂曲附

金國使人到闕紫宸殿宴參軍色致語口號

勾合曲詞

致語

琬圭修聘方申締於歡盟離俎均恩爰肆陳於慈燕  
肅簪紳而拱極儼旒冕以當天洪施豐融輿情樂豈  
恭惟 皇帝陛下建中布度執競凝圖英略淵通昭  
徹天人之表深仁溥博際蟠宇宙之間旁開衆正之  
門廣闢太平之路念寶鄰之永好嘉虜使之多儀置

帳于神麗之庭下輦于明光之殿風回鳳蓋密瞻煥  
渥之容日度鰲峯屢轉華旗之影寫淳音於調露汎  
嘉氣於流霞君臣歡康中外寧壹臣叨居法部幸際  
熙辰上奉宸顏敢進口號

口號

春風黃繖下清廂纓弁蟬聯宴未央禹國文明周禮  
樂九重端穆舜衣裳雲低殿幄星辰近漏轉宮花日  
月長聖主寬仁盟好永和聲細入鹿鳴章

勾合曲

曉日周原念使駢之勤勩春風漢殿開燕席之從容

筍簋畢陳笙鏞間奏式遂莘魚之樂聿來祥鳳之儀  
上悅宸顏教坊合曲

金國賀正且使人到闕紫宸殿宴致語口號  
勾合曲詞

致語

周曆誕頒適履端於令旦漢儀高會爰示惠於羣臣  
清光粹溫協氣充塞恭惟  皇帝陛下體元御極贊  
化宜民當三陽開祚之辰展萬壽稱觴之禮臣等恭  
陳口號仰奉宸歡

口號

九重帳殿敞層空清曉羣臣宴鎬宮神護翠華居北極春隨黃傘下東風觴行隱隱紅雲裏仗轉幢幢瑞日中看取乾坤俱壽域兩朝時節聘車通

勾合曲

和樂在陳嘉觴當御日度層峯之影風回廣殿之春上悅天顏教坊合曲

金國賀會慶聖節使人到闕集英殿宴致語  
口號勾合曲詞

致語

冬權肇始陽月就盈當真人誕育之辰正寶曆明昌

之運 皇帝陛下樂同萬國禮厚羣賢啓惠燕於端  
宸流恩光於廣坐君臣相悅福祿無疆臣等上奉天  
顏敢進口號

口號

良月欣臨震夙辰恩涵雨露燕羣臣遙連漢岳三呼  
應徐聽虞韶九奏淳仙篆縈風浮廣殿卿雲擎日護  
嚴宸奉觴更喜嘉賓會同祝 吾皇萬壽春

勾合曲

丹宸天臨華簪雲會旣洽莘魚之樂宜觀韶鳳之儀  
上悅宸顏教坊合曲



金國賀正旦使人到闕集英殿宴致語口號

勾合曲詞

致語

斗轉琤穹序正夏時之統星環寶座儀陳漢殿之圖  
嘉生阜繁協氣元塞恭惟 皇帝陛下聰明天錫剛  
健時行對昌會之亨通同羣情之燕樂臣等輒收輿  
誦盡入歡謠

口號

殿頭清蹕起晴雷萬歲聲中扇影開曉日青旗明絳  
闕春風黃傘傍瑤臺卿雲湧瑞扶天座仙露流甘入

御盃要識八荒俱壽域年年常看使星來

勾合曲

華幕張庭翠裘臨座旣洽嘉賓之樂宜聞治世之音  
上悅天顏教坊合曲

會慶聖節使人到闕集英殿宴致語口號勾  
合曲詞

致語

冬律乘乾皇圖開泰千載慶生商之旦四方同戴舜  
之心撫運隆昌對時康乂轉丹輿於廣殿張翠幄於  
彤庭雨露涵濡風雲際會臣等輒陳歡誦仰奉威顏

口號

雲護輕霜漏曉晴日高黃金傘影亭亭六龍衛蹕來臨  
座五鳳儀韶下舞庭地湧南山朝帝殿天回北斗挹  
仙臨侍臣近識宸顏喜時願皇皇二使星

勾合曲

景轉繒峯香浮黼座旣上萬年之壽當條九奏之音  
致語

周官頒曆正月之吉始和漢殿登圖諸福之物畢至  
恭惟 皇帝陛下剛明獨運慈儉安行應乾坤交泰  
之辰合君臣相悅之樂鸞觴當御鷺羽分庭臣等敢

酌民言用成口號

口號

四時和氣轉洪鈞昨夜璿杓正指寅萬玉鳴班朝廣  
殿五雲扶輦下端宸翠旄低引仙韶度寶輦徐傳御  
醴醇看取年年來信使定知天地一家春

勾合曲

日轉鰲峯雲低鳳蓋流人間之歡詠入天上之和聲  
金國賀會慶節使人到闕集英殿宴致語口  
號勾合曲詞

致語

天開景命璿樞應千載之符時協昌辰玉殿獻萬年  
之壽恭惟 皇帝陛下神謀高運仁德安行受福無  
疆垂虞裳而臨正宁與民同樂開鎬燕而集羣臣流  
仙露以溶津結卿雲而駐采臣等敢緣嘉會輒貢蕪  
詞

口號

盛節簪紳宴玉京紅雲深護赭袍明寶花合座天香  
滿仙羽分陳御學行原隰有光交信睦廟堂無事樂  
和平歡心協氣知多少盡在今朝九奏聲

勾合曲

萬歲稱觴已祝聖人之壽九成合奏宜揚治世之音  
金國賀正且使人到闕紫宸殿宴致語口號  
勾合曲詞

致語

臣聞帝執規而布治萬物俱榮王在鎬以示慈羣情  
胥樂乾剛高運豐照端中撫邦家晏粲之辰應天地  
亨嘉之會彤庭合弁迎義馭之舒長寶座傳觴況衢  
尊之多旨臣等欣逢令旦冒貢蕪詞

口號

東風初滿殿前旗環珮春容侍燕時帝澤普涵春自

暖人心同樂日先遲三峯影裏瞻鰲動九奏聲中看  
鳳儀更喜使華齊獻壽八方何地不熙熙

勾合曲

仙羽分庭宮花覆座旣洽惠慈之樂宜揚儼繹之音  
金國賀正且使人到闕紫宸殿宴致語口號  
勾合曲詞

致語

臣聞五始書正集嘉祥於華且萬年稱壽望辟表於  
中天惠燕雲需歡聲雷動恭惟 皇帝陛下聖神廣  
運慈儉安行政布青陽對三朝之亨會恩垂湛露流

四海之深仁臣等仰悅宸顏俯陳口號

口號

仗轉瞳瞳曉色瞰千官齊望赭袍尊食苹鳴鹿迷天  
樂泳藻游魚沐聖恩香泛流霞涵雨露春隨和奏滿  
乾坤使華同上南山壽近識宸顏一倍溫

勾合曲

玉醴飛觴金壺緩箭宜合虞韶之奏更均鎬燕之歡

六州

商秋吉嘉會協中辛涓路寢修禋祀聖德昭清端志  
慮罄竭齋精錦繡排天仗羽衛繽紛朝太室返中宸



被袞接神明時平天地俱清晏兼豐年和氣品物達  
芳馨瞻煥座春容娛燕三靈與瑤爵薦量幣清思呦  
冥冥望昆侖嘉祥塞網罟誠禪禮洽慶休成潤澤被  
生民端門肆眚所庭稱賀俱將景福萬壽祝雙親

十二時

助華竝天胙昌期聖德茂重離英明經遠濟哲昭微  
寶儉更深慈觀萬國累洽重熙對明時報禮秩神祇  
玉帛奏華夷雍肅顯相百辟各欽祇奄嘉虞英壁奠  
華滋神安坐景氣澄虛極光燄燭長麗展詩應律萬  
舞逶遲三獻洽皇儀垂靈寢慶祐來宜禮無違鳴鑾

臨帝闕飛鳳下天倪清和寰宇霈澤一朝馳醇化無  
爲萬祀肇洪基

登門肆赦皇帝升御座宮架奏黃鍾宮乾安  
之曲

大禮備矣鑾車闐闐帝來維何賚及幅員有聲伊肅  
有容伊虔彼雉斯開帝坐中天

皇帝降御座宮架奏黃鍾宮乾安之曲

帝坐中天流澤演迤厥蒙伊民歌舞以喜澤流普矣  
民喜偕矣駕言徂歸福祿同矣

太祖皇帝位酌獻登歌作大呂宮彰安之曲

一德開基百年垂統中天禘郊薄海朝貢寶龜相承  
器鼎加重澤深慶縣帝復命宋

皇帝入小次宮架奏黃鍾宮儀安之曲

匏尊既舉蕙席未移有德斯顧靡神不娛物情肅穆  
天宇清夷宅中受命永復邦基

亞獻宮架奏黃鍾宮穆安之樂威功睿德之  
舞

四阿有嚴神既戾止備物雖儀潔誠惟已有來振振  
相我熙事載酌陶匏以成恭祀

送神宮架奏圜鍾宮誠安之曲一成

奕奕宗祀煌煌禮文高靈下墮精意升聞熙事既畢  
忽乘青雲敢拜明况永清世氛

皇帝還大次宮架奏黃鍾宮鵠安之曲

應天以實已事而竣鵠案朝帝竹宮拜神靈光下燭  
協氣斯陳福祿時萬基圖日新

皇帝上

太上皇帝壽樂曲

陞坐用聖安之曲

簪纓列序羽衛分行雉扇爰徹天威煒煌清明在躬  
順頤昂昂威拜稽首萬壽無疆

公卿入門用禮安之曲

端闈肅啓金奏和聲有來濟濟燁其華纓度中規矩  
步協英莖一人達孝百辟丕承

皇帝上 太上皇壽酒用福安之曲

笙鏞儼繹簋簠騰驤奉觴介壽龍袞黼裳盛儀克舉  
至德用章刑于四海化洽風揚

上壽用崇安之曲

凝旒肅穆鳴佩春容有酒伊醕管磬其從典禮絢縟  
威儀恪共頌堯之壽與天比隆

太上皇帝初舉酒用蟠桃之曲

結根聞苑登實瑤池紅雲駢艷瑞露含滋味參石髓  
名配松脂王母一笑河水漣漪

再舉酒用大椿之曲

培植自古質淳以全凌傲霜雹盤薄風煙朝菌焉識  
楚蕢詎肩聳柯擢幹終古蒼然

三舉酒用瑞鶴之曲

彼肅者羽名紀仙經芝田下啄容止安停引吭警露  
響徹青冥聖德格物來儀帝庭

四舉酒用祥龜之曲

粵有靈物負圖效祥蓮棲著宿錦文有章天和發越

睿澤沕洋沂于宮沼美應昭彰

五舉酒用老人星見之曲

奕奕南極應期曜靈祥暉昭衍次丙躔丁事垂漢史  
名著甘經錫符祚聖億萬斯齡

降坐用福安之曲

慶典具舉皇慈溥將禮光長樂事掩未央佩環濟濟  
金石鏘鏘天容有懌言旋建章

羣臣酒三行竝用正安之曲

曉日敞天門星環華盍簪明良賡舜日富壽祝堯心  
穿仗搖旗影鳴珂混樂音聖朝敦孝理百辟盡丕欽

縹緲殿中央紅雲捧紫皇香風飄綵仗仙露滴霞觴  
樂度儀鳳曲恩流振鷺行萬年天下養寶祚享靈長  
清漏滴彤壺皇仁雨露濡遙瞻天一笑同効岳三呼  
御醴傳觴速宮花覆座敷欲知歸美意歌頌在康衢  
酒一行罷用萬壽無疆之舞

三紀御圖道豐德盛化洽兆民功光列聖昇託有歸  
脫屣萬乘優游法官頤神養性峒峒具闕豐麗靖淵  
游神象外玩意物先爲衆父父尊榮配天大福備祿  
何千萬年

酒再行罷用聖德重光之舞



於穆聖子仁天智神體剛立極寶儉化民美政畢舉  
舊章聿遵舞以象德儼韶實倫龍樓問寢前殿奉卮  
密承慈訓不忘其祇海宇豐阜邊陲晏夷予以養志  
福祿來宜

崔舍人玉堂類藁卷第十八

霍舍人玉堂類藁卷第十九

祝冊詞表

明堂大禮祭享皇地祇冊文

博厚載物靜專承天溥彼羣生裕于大化欽念菲質  
紹承慶基山川晏寧稼穡蕃阜膺受靈顧不敢怠遑  
練吉商辰修報世室與以黃玉薦以黝牲承神至尊  
精意孚盡臨錫景福垂休無疆

太祖配享冊文

五代脞聞萬姓請命誕降真主風揮日舒方夏載寧  
爰倫攸序天德地業詒厥子孫傳及眇冲嗣守神器

夙夜祇畏思昭大猷報本返初無物可稱宗祀世室  
陟配兩儀威神在天右序罔極

太宗配享冊文

維聖肇造維明纂承廣聲昭功混壹函夏文熙武鬯  
底于丕平世承慶休施逮眇德是述是紹不敢□□  
金行肅秋歲物告阜祇舉盛典大饗合宮明明祖宗  
竝侑于坐來燕來止綏福萬邦

明堂大禮修整雅飾太廟畢土時前奏告祖  
宗帝后神主還殿室祝文

祀展合宮享先太室嘗畢加於修飾已具益於神深

敢告前期將伸還奉

安穆皇后安恭皇后祝文

具嚴闕宇祇爰靈遊屬當大饗之期嘗飭加修之役  
逮茲訖事敢以告虔

正奉安祖宗帝后神主祝文

崇崇總章戒于大饗奕奕清廟謁以先期旣庇役以  
圖新爰消辰而還御敢孚誠意庶安神遊

正奉安懿節皇后祝文

明堂孔陽精禋是舉闕宮有恤虔饗攸先嘗祇戒於  
繕修茲具觀於嚴靜敢消良日永爰靈遊

安穆皇后安恭皇后祝文

宗祀維時先期是饗嘗加修於闕宇庶具歲於祓客  
茲告訖功敢祈旋位

明堂大禮畢皇后賀 皇帝表詞

觀時亨會酌千古之彌文遵國彛章展九筵之嘉饗  
禮儀旣備慶賜遂行恭惟 皇帝陛下聖孝日勤皇  
仁天覆據域中之位盛德通於明神采汶上之圖美  
報修於元祀四方來賀萬壽無疆妾正體坤儀承休  
軋運當告成於熙事實倍喜於柔悰

皇帝答皇后詔本

朕祇適舊章肅稱元祀嘉氣被乎重屋美光燭乎崇  
筵神靈燕虞福應顯見欽荷博臨之况愈深寅畏之  
懷遽覽奏陳具形贊喜重爲披閱良集褒嘉

天慶觀預告五嶽四瀆祝文

消辰商籥歲事總章重循眇躬曷究盛典卽此祕宇  
告于羣神尚祈孚休汔遂成禮

雷神雨師祝文

國家宗主百神稱秩羣祀凡以芘佑生民也今自夏  
愆澤越秋亢陽雨猶不滋苗將卽槁神掌茲事寧忍  
弗圖側躬焦勞用以誠薦

## 天地

蓋聞王者正五事以承天心乃雨暘以時民用樂康  
永念眇躬奉承基緒維德弗逮無以感通陰陽之和  
乃自夏秋之交旱魃爲虐良疇沃壤胥爲焦原嗷嗷  
下民行且艱食慮念憂灼罔識所圖是用飭遣大臣  
請于天地之靈願垂畀矜亟賜膏澤使稼穡中熟民  
獲免於阻饑敢不夙夜寅畏以承嘉休

## 社稷

維國家秩祀社稷所以助生萬物也今自夏乃秋農  
壤匱澤滌滌旱野播爲埃塵民情焦然行且艱食永

思厥咎夙夜兢畏無以感回天心維神國之尊奉民  
之依賴其尙應時消沴以惠福于我有邦吁嗟以請  
庶其鑒之

別廟 懿節皇后祝文

安穆

安恭皇后

同詞改慈德  
作后德

茲緣旱虐浸害農田竝告神靈庶蒙膏潤欽惟慈德  
孚佑我家迄臻順成實藉陰相

五嶽四瀆祝文

自夏亢陽越秋匱澤旱旣太甚民將亡聊寅念山川  
之神寶司雲雨之柄祀垂萬世望冠百靈適災沴之



已長豈神明之弗恤願垂嘉應汔底豐年庶宏濟於  
民生當永虔於邦禮

十神太一祝文

行基布氣福庇兆民闕宇棲真禮崇羣祀適屬愆陽  
之序已深艱食之虞敢竭齋明用通靈應願下九天  
之御亟垂三日之霖盡起稟苗頓還豐歲吁嗟以請  
庶矜佑之

宗廟

寅念涼德奉承丕基無以感通神祇消弭災異乃夏  
秋之交旱魃爲虐良疇沃壤胥爲焦原嗷嗷羣情行

且艱食慮念憂灼罔識所圖惟祖宗在天之靈矜哀  
下民昇佑膏澤使歲得中熟民獲免於阻飢敢不夙  
夜祇栗以承嘉休

九宮貴神

惟神道參上帝德芘下民稽按靈典實專主風雨霜  
雹之事此國家所以虔共奉祀以迎嘉休也今夏秋  
亢陽勢旣太甚滌滌旱野噉噉民情化災爲穰功在  
頃刻輸誠以告庶矜佑之

皇帝進奉 太上皇后生辰表詞

金風扇物王商籥之佳辰玉殿稱觴紀慈闈之誕序

三神合慶四海交驩恭惟履德謙恭游心清靜啟塗  
山而輔贊蚤濟中興坐少廣以逍遙晚偕難老屬臨  
令節益介純祺臣祗荷親仁紹承邦緒萬年康壽方  
修視膳之勤百葉雲仍更祝含飴之樂

皇帝進奉 太上皇后生辰功德疏

祥開沙麓慶千載之昌期教歲琳宮輯九天之妙果  
爰申頌祝益罄齋明 云云 恭願百順雲臻萬祥川至  
享無量福永延昌熾之休會長生君同樂清虛之境

春分前修整補種奏告 昭慈聖獻皇后櫝

官 永祐陵櫝官表文

義律和聲正協鳴庚之序漢陵王氣已成拱木之陰  
爰及芳辰俾加庶役是遵彝典敢告先期

安恭安穆皇后攢宮祝文

金屋長違玉衣永闕適及融和之序當加修治之宜  
庀役維時涓辰是告

仲春修整修換殿室什物并補種窠木奏告  
昭慈聖獻皇后攢宮 永祐陵攢宮表文

肅瞻吉兆近在勝區春事方興宜加於締葺靈旂是  
宅實慮於震驚敢告役期庶孚神監

顯恭皇后表文

增嚴仙寢遵用彝章事役得宜已涓於良日神靈貴  
靜爰告於先期仰冀永寧俯垂丕福

安穆皇后安恭皇后攢宮祝文

春律將中國章是舉爰增嚴於域兆已夙戒於工徒  
涓辰旣良先事乃告

奏告

徽宗皇帝神帳朱漆黯淡起剝合行重朱換  
殿脊攔損爛告遷神御權安奉表文

肅瞻仙域近在輔藩帳座黠昏合加顯設殿楹弊腐  
仍俾更新涓時日以卽工奉衣冠而移御具敷誠悃

虔妥威靈

奏告

顯恭顯肅顯仁皇后神帳朱漆暗淡起剝合  
行重朱告遷神御權安奉表文

同前表文威靈改作光靈

攢宮下宮疎漏齟瓦祭告告遷

安恭皇后神御於殿東廊權奉安祝文

眷彼寢封戒茲工役當奉遷於靈御庶寧妥於真游  
爰卜良辰敢伸虔告

奏告

徽宗皇帝神帳重行朱漆并重換殿脊攔畢  
工告遷神御還殿正奉安表文

禹山神麗漢寢崇深鳩役加修用嚴弓劒之地消辰  
告備復妥衣冠之遊爰布誠忱虔通靈鑒

奏告

顯恭顯肅顯仁皇后神帳重行朱漆畢工告  
遷神御還殿正奉安表文

慈德在天眞遊有所近加貴飾嘗遷寓於神靈今告  
鼎新庶永寧於容御既涓良日敢布丹衷

太常寺申撰成都府新繁縣裝飾六朝御容

衣紋及修飾殿宇奏告祝文

坤維地遠嘗寫真容繪事工深儼存遺範慨棟楹之  
歲久慮冠劒之塵侵因飭更新用嚴崇奉旣鳩庶役  
敢告前期遐想威靈默通誠素

崔舍人玉堂類藁卷第十九



崔舍人玉堂類藁卷第二十

祝冊詞表

春分前繕修補種奏告

昭慈聖獻皇后攢宮 永祐陵攢宮表文

禹會名山漢陵勝兆春陽方動適稽按於燹章工役  
當興慮震驚於真御敢涓良日祇告前期冀寧宅於  
仙區訖敷遺於後利

安恭安穆皇后攢宮祝文

瞻懷丘寢嚴奉容衣春事旣興國章攸舉考日茲吉  
僦工是宜維妥而寧敢前以告

祭告

安恭皇后爲下宮殿內踈漏箔繖展畢工告  
遷神御還殿正奉安祝文

邀瞻仙域近在勝區旣殿宇之圖新宜容衣之還御  
敢涓良日庶妥靈遊

奏告

懿節皇后神帳朱漆暗淡起剝并帳座損爛  
及架棚走趲修換重行聿正告遷神御權安  
奉表文

仙寢成陰神遊安位屬舉繕修之事深懷震動之虞

敢卽先期暫移靈御俟畢成於庶役卽還奉於真容

奏告

懿節皇后神帳朱漆暗淡起剝并帳座損爛  
及後架擱走趲修換重行華正畢工告遷神  
御還殿正奉安表文

頃緣庀工嘗告遷御官師肅給旣徒役之時休帳殿  
靖深宜靈神之遄返敢消良日用達丹誠庶安佑於  
真遊益綏成於景福

報謝天地祝文

比以驕陽浸成重霄嘗極吁嗟之請冀回眷佑之仁

於遂感孚日聞霑洽農畝間成於中熟漕渠悉底於  
大通爰竭誠衷用伸報禮

太廟祝文

眷佑二字改作顧佑字餘同

社稷祝文

眷佑二字改作鑒佑字餘同

太乙文同社

九宮貴神祝文同社

五嶽五鎮祝文

比者驕陽煽沴時雨愆期閔此下民瀕於艱食竝走

羣祀畢輸丹誠迄蒙靈休旋獲嘉潤農畝間熟河流  
大通敢涓剛辰用謝昭貺

四海四瀆祝文

同前

雷神雨師祝文

同前

別廟懿節皇后祝文

比緣旱魃浸害農疇嘗布誠忱庶回休應迄臻霑洽  
遂慰焦勞敢涓剛辰用謝靈貺

安穆安恭皇后祝文

進呈安奉前二日奏告景靈宮中後殿祝文  
書成良史篇奏法官紀四聖之宏規垂萬年之偉範

事關廟社慶集臣民將謹寶藏敢祈孚鑒

閏三月旦望起居景靈宮諸神御并永祜陵攢宮  
昭慈聖獻皇后攢宮會聖宮等表詞本

諸帝旦表

生民之道要在正時附月之餘乃維置閏式因朔旦  
庸舉國章恭惟恭儉寬仁聰明齊聖垂子孫而作則  
參天地以成能茲履昌辰益懷遺烈爰致吉蠲之饗  
用伸感慕之誠

諸后旦表

月分重管日累餘躔晦明之數罔愆寒暑之宜遂正

恭惟化參坤育功濟乾行道德流長永錫蕃昌之福  
歲時運往空懷遐邇之靈敢率彝章用修芳薦

諸帝望表

振美於辰適春華之方盛歸奇於劫乃天道之有成  
恭惟恩浹綿區德高遠古銅渾度正方遵政教之常  
金鼎光寒徒望威靈之遠

諸后望表

斗杓斜指旣協芳辰月魄中圓又當良日恭惟倪天  
表異儷極功高流美化於四方貽徽音於萬世敢陳  
嘉薦庶達丹誠

孟夏車駕詣景靈宮朝獻祝香文

盛德日升洪休川至建無前之美業輦不拔之丕基  
孟冬車駕詣景靈宮朝獻祝香文

皇圖安永帝業隆昌慈闈申萬壽之休宸宇共三登  
之樂

太陽交蝕祭告祝文

太史有言日食在朔深惟變異不遑寧居伐鼓用牲  
國有彛典消弭厥咎繫神之休

太陽交蝕祭謝祝文

太陽當虧是謂變異竝舉常典側躬省修重除蔽霄



潛護光體神實賜況敢忘薦誠

孟春車駕詣景靈宮朝獻祝香文

皇圖天大聖德日躋兩宮永享於壽昌萬國咸臻於  
康富

孟春車駕詣景靈宮朝獻祝香文

邦圖鞏固親壽延昌三邊仍偃革之安萬國遂登臺  
之樂

孟夏車駕詣景靈宮朝獻祝香文

三邊安靜五穀順成凡居覆載之間咸享和平之福  
明堂大禮禮畢車駕詣景靈宮恭謝祝香文

祿將太室宗祀合宮慶盛禮之熙成擁嘉祥之滋至  
二云云伏願德參五帝功冠三王邦國開不世之基親  
壽介無疆之福

告謝五嶽四瀆祝文

蒐講彌文紹修元祀霽霖雨於先夕燭靈光於嚮晨  
迄底休成實多陰相敢陳芳薦竝答殊休

孟春車駕詣景靈宮朝獻祝香文

民生康阜親壽綿長三邊臻偃革之安萬國遂登臺  
之樂

太常寺申撰進呈安奉

三祖下上五世宗藩慶系錄

眞宗皇帝玉牒奏告青詞

鉅典時脩有司告備昭列聖蕃昌之緒修真皇盛大  
之休已消卜於剛辰用闕藏於邃宇仰祈淵鑒永覆  
丕圖

安奉奏告中後殿祝文

祇涓吉旦登進成書慶述祖宗將謹寶藏之永事關  
社廟敢忘昭告之勤仰冀靈觀俯垂孚鑒

孟夏車駕詣景靈宮朝獻祝香文

伏願基圖鼎固功業川增親庭膺萬壽之休海宇遂

三登之樂

孟秋車駕詣景靈宮朝獻祝香文

帝業隆昌皇猷光大盡恢文武之境土永垂堯舜之衣裳

孟冬車駕詣景靈宮朝獻祝香文

福祥川至功業日新居中土以制四方開明堂而朝萬國

孟春車駕詣景靈宮朝獻祝香文

治功日進聖壽天齊盡恢故境之廣長永奉慈庭之康樂

孟秋車駕詣景靈宮朝獻祝香文

伏願四方安泰五穀豐登躋治効之隆昌奉親顏之  
歡樂

孟冬車駕詣景靈宮朝獻祝香文

二氣敷和三靈駢福嘉雪消餘年之疵癘慶雲占嗣  
歲之豐登

明堂奏告天地宗廟社稷別廟祝文

祗承親訓稽協邦常因萬物之成秋舉九筵之祫祀  
仰祈昭鑒虔告先期

宗廟祝文 社稷祝文

昭鑒改云孚鑒

別廟祝文

參講上儀肇修宗祀已卜洎於嘉序嘗飭戒於先期  
爰率故常竝伸預告

奏告五嶽四瀆祝文

四首一詞係  
路通去處

遵用彛章紹修宗祀卜洎時日之吉敷告山川之靈  
庶達虔誠竝孚聰鑒

祭告五嶽四海四瀆祝文

九首一詞係  
路未通處

肅涓嘉序祇事合宮慨疆域之未還瞻山川之尚遠  
竝陳芳薦遙告先期

明堂大禮前二日朝獻景靈宮分詣奏告中

後殿祝文

紹承慶運蒐講上儀循三歲之彝章舉九筵之親祀  
敢先信宿祇款神靈庶達明誠竝垂孚鑒

後殿祝文

鍊吉商辰躬祠世室翕來四海之助昭格三靈之歡  
敢飭前期祇修嘉薦仰祈丕佑永庇昌圖

青詞

紹舉明禋已消辰而展采祇循彝典敢先事以告虔  
肅仰真風□扶丕緒冀鑒臨於精意益申錫於純禧

奏告諸陵帝后及昭慈聖獻皇后攢宮永祐  
陵攢宮表文

荷天休命當修大報之常稽古彌文肇舉合宮之饗  
茲逖瞻於真域敢祇告於先期爰達丹誠庶孚靈鑒  
奏告安穆皇后安恭皇后攢宮祝文

三歲親祠具存常典九筵宗祀丕講上儀飭事維虔  
先期是告

崔舍人玉堂類藁卷第二十



崔舍人附錄

告詞

除祕書省正字告

乾道九年二月二十五日王淮行

勅左宣敎郎林枏等朕聞三館以待方聞之士異時  
詞臣講官與夫司言責掌諷議爲時名臣者由此塗  
出故擇之必精試然後命所以重其選也以爾枏博  
學而多聞爾彌大方重而有立爾敦詩罔毅而不同  
振藻儒林見謂國器奏篇來上煥乎可觀宜從英俊  
之遊往司是正之職益務涵養以副朕知可

進中興會要轉宣敎郎告

乾道九年十月十四日王淮行

勅左迪功郎守祕書省正字陳自脩等昔司馬談爲太史方天子建漢家之封而留滯周南以所欲論著屬其子遷於是紬石室金鑽之書而史記作焉蓋抱良史之才當筆削之任遇大典冊曾不得措辭其間可勝惜哉惟我太上皇帝中興盛典講於俶擾之際得於授受之日固已越商周而追唐虞久而無述懼有闕焉肆命大臣典領成書爾等俱以儒英入館閣佐太史氏親見聖王之傳顧不戢歟晉陟京聯以旌爾勞以貽訓于億萬世則爾與有無窮之聞可

除崇政殿說書告

淳熙元年正月  
初四日王淮行

朕蒐攬英雋置諸冊府如莛梓杞待其成材凡一時  
詞臣講官鮮不繇此有能翹然自拔於衆人之中則  
將試而用之進以不次爾性識敏悟學業夙成見於  
文詞有秀傑邁往之氣朕旣爲爾綿蕝典故擢直翰  
墨之林經幄需賢肆以命爾可謂士之榮遇者矣昔  
魯秉周禮敵人不敵加兵禮之有益於國如此据古  
以言無爽朕聽可

除著作郎告

淳熙六年正月  
二十日陳駿行

爾作屬西府精於編摩攝直北扉工於潤色亟立要  
津衆亦爲允然猶儲之東觀何哉蓋夷玉不厭於韞

藏良材益務於培養矧慈極所授訓言隆典以來政  
事實資閱博纂成冊書往奮筆焉豈曰弗稱可

進日曆轉奉議郎告

淳熙六年四月初八日李木行

王者世有史官君舉必書所以謹言行昭法式也爾  
充職蘭臺典司著誤傳信萬世實藉三長汗青告成  
宜進官列更勤繼錄以對恩榮可

進會要轉朝奉郎告

淳熙六年八月初十日李木行

勅朝散郎試祕書少監施師點等朕自膺傳緒常務  
策勵以時繫年廣記已藏於嚴密舉綱撮要類分將  
備於討論爾等學擅該通才高述作備竭勤勞之力

共成詮次之功遂續前編同標鉅典宜被進官之寵  
用旌載筆之良祇服予恩益恭汝職可

進三朝寶訓轉朝散郎告

淳熙七年五月  
施師點行

朕欽惟藝祖肇造區夏太宗真宗繼統揚業其宏摹  
遠略載諸簡編以爲子孫億萬斯年之訓者殆與典  
誥相爲表裏朕丕承厥緒歷選名儒進讀於退朝之  
暇是憲是述罔敢荒寧逮茲終篇可無褒賞爾高文  
綺潤奧學淵淳進直北門親結九重之眷入陪西學  
光膺再命之榮屬恩典之遂行肆文階之序進其祇  
戒渙益勵忠規可

除國子司業告

淳熙七年七月十五日鄭丙行

勅朝奉大夫國子司業兼國史院編修官兼太子侍講何耕等朕惟永平之際園橋門以億萬計正觀之盛闢黌舍千二百區人文之興治道以立茲用恢宏學校建置師儒庶幾禮義之行可致肅雍之化以爾耕渾然道德不見圭角爾敦詩阜爾文辭富有波瀾秀出班行表表愈偉領袖後進于于而來其竝列於成均庸丕闡於儒教化民成俗必由學式崇賢士之關俾師考德以爲官益勸範模之美可

再除崇政殿說書告

淳熙七年七月二十三日施師點行

春秋王道之權衡也朕所朝之餘詳延鴻博敷釋於前蓋將究其指歸以補治道之未至與其選者寔難其人爾才茂而識明學深而文富北扉視草增潤於皇猷東觀紬書追芳於良史是用陪露門之間燕粢麟筆之討論推褒貶於一字之嚴辨得失於三傳之異毋嫌諄複庶廣緝熙緊爾嘗爲奚俟多訓可

進讀正說轉朝請郎告

淳熙八年五月十三日未待問

朕永念定陵貽孫謀於億世肆臨講殿敷正說於諸儒爾思好深湛辭尚體要司成胄序蔚爲雋造之宗寓直複門式擬坦明之制進聯侍學論本□□茲□

絕業之修宜錫懋官之寵侈而稽古昭我右文可

除中書舍人告

淳熙八年九月二十四日未待間行

朕澄出治之源公馭臣之柄遶求端士寘諸禁密之  
聯比飭溫言責以論思之益矧參華於內史必試可  
於真材具官崔敦詩文企前修器先遠識荐游冊府  
胸中儲未見之書晉長膠庠館下服于勤之業經幙  
久嘉於侍學綸闈獨擅於摘詞允爾所長恢乎餘地  
載惟西臺命令之本豈徒東里潤色之工一賞或僭  
則國維不張羣枉未排則官邪猶在能盡言而無隱  
斯庶政之惟醇蔽自予衷擢居是選朕於知人則哲



追盛治於有虞爾其遇事不回繼祖風於祐甫

致仕告

淳熙九年十二月十五日字文价行

持橐甘泉方極清華之選挂冠神武忽騰休退之章  
曾雅志之莫回宜贊書之寵錫具官崔敦詩才猷敏  
瞻問學淵源入踐班聯早膺識擢三館兩學久陪英  
俊之遊西掖北門獨擅詞章之煥有資獻納遽爽節  
宣正當強仕之年欲致爲臣而去肆稽彛典寵陂文  
階勉加調攝之功益介康寧之福

贈中大夫告

淳熙十二年二月十六日王信行

耄老歸休駭予聞聽將終占奏嗟爾淪亡眷□□□

通聯頌愍章之殊渥具官崔敦詩文詞藻蔚問學□  
澄蚤階英雋之游徧歷清華之選代言西掖簡自朕  
知攝直北門創由卿始方快雲霄之直上忽驚蒲柳  
之易衰緬懷朝夕論思之誠深悼春秋奄忽之事用  
稽令典峻陟文階豈惟榮及於爾終抑亦賞延于厥  
後尚其英爽服此寵光可

祭文

同朝侍從

維淳熙九年歲次壬寅五月丙午朔十五日甲申敷  
文閣學士通議大夫提舉佑神觀韓彥直太中大夫  
權吏部尚書兼同修國史鄭丙太中大夫權兵部尚  
書兼侍讀兼同修國史兼權禮部尚書芮輝降授朝  
請大夫權工部尚書兼知臨安府王佐朝請大夫龍  
圖閣待制樞密都承旨蕭燧朝請大夫權尚書吏部  
侍郎葛邲朝散大夫權尚書戶部侍郎曾逮朝散大  
夫權尚書刑部侍郎兼詳定一司勅令賈選朝請大

夫太府少卿兼權戶部侍郎燕世良謹致祭于崔公  
侍講直院中書舍人靈筵嗚呼目光輪囷間氣扶輿  
萃于二妙聯翩俊儒鳳鶴接羽同翥天衢公又超詣  
一日千里玉珮瓊琚厥辭愈偉爰自水天聲華特起  
昭徹宸聽華袞褒之主父見晚司馬同時攝直代言  
創見於斯紫誥黃麻俱自有體公兼二長文不停綴  
盤詰聲牙英莖粹美垂紳正笏密勿謀謨豈惟翰墨  
組麗之徒人所跂望李裴與俱云胡半途濛汜已極  
人生萬事孰可料測閱日幾何榮悴懸隔嗚呼哀哉  
天畀公厚莫畀其全文固卓立位亦可言所欲然者

不假之年顏夭跖耆畸偶定數死生夜旦公當理悟  
弱妻穉子可念荼苦彥直等實同僚案敢置交情屬  
詞致奠核旅酒馨魂今歸來不昧平生

給舍經筵

維淳熙九年歲次壬寅五月丙午朔十六日乙酉朝  
請大夫試給事中兼太子詹事施師黜中大夫守中  
書舍人兼太子左庶子本待問朝散大夫新除中書  
舍人兼侍講宇文价朝奉大夫新除起居郎兼太子  
侍講詹儀之奉議郎新除起居舍人兼侍講王藺謹  
致祭于崔公侍講直院中書舍人靈筵惟公天稟之

閨明兮又種學之敏強涉經史之澗漫兮窮百氏之  
溫觴文辭蔚其芳腴兮追前修以翱翔蚤拾芥於賢  
科兮聲浸徹乎帝旁道山藏室俶發軔兮儵進直乎  
玉堂黃麻紫詔多出其手兮仍勸講乎華光后皇嘆  
其信姱兮曰汝其持橐乎駕行鼉西掖暮北門兮覃  
思乎翰墨之場駕駟馬於九達之夷路兮夫孰測其  
騰驤一疾忽其變遷兮奄脩夜之不暘嫠抱病而枕  
泣兮穉呱呱而沾裳聞者爲之隕涕兮矧同寮之愛  
忘嗟人世之夢幻兮難控揣以爲常有生終於必死  
今何有茵樁與彭殤惟俯仰無愧怍兮啓手足其奚

傷陳溥奠以寫哀兮魂英明其來嘗

同朝學官

維淳熙九年五月丙午朔十一日庚辰朝請郎守國  
子司業沈揆承事郎國子監丞黃唐寄理宣敎郎國  
子博士李祥宣敎郎太學博士勾昌泰文林郎太學  
博士黃艾文林郎太學博士羅黶秉義郎武學博士  
陳說朝奉郎行國子監主簿喻良能秉義郎武學諭  
王公弼從政郎行國子監錄方有開迪功郎太學錄  
章穎從事郎國子監書庫官戴履謹以清酌庶羞之  
奠祭于侍講直院中書舍人崔公之靈惟萬生之紛

綸孰主張其榮悴伊通塞之靡常厥去來之莫避或  
蘊蓄而不信或堀奇而弗試能崑崙以自表蓋千萬  
而一二公擢秀於淮服蚤蜚聲於高第雖棣萼之齊  
芳固升沉之頓異自時命之獨遭躋清華於中祕彼  
金鑾之三入重成均之置貳上紫微以秉筆俾兼司  
於兩制用翰墨以承恩亦罕聞於近世謂搏扶而未  
已胡半塗而逢癘昔伯氏之閔凶銜餘哀而未艾嗟  
遺息之甫非藐諸孤而誰諉夫旣畀之利達兮忽中  
僨而何謂豈命力不兩立兮付成虧於一致潔酒肴  
以在列兮耿哀懷而莫寄感情契之不能忘兮聊寓



誠於一誅

在朝同年

維淳熙九年歲次壬寅五月丙午朔十二日辛巳承  
議郎監行在左藏西庫陳公亮朝散郎通判臨安軍  
府事王明發承議郎行太府寺丞柳大雅朝請郎守  
國子司業沈揆從事郎主管尙書禮兵部架閣文字  
王三恕朝奉郎太常博士宋若水從政郎監行在草  
料場朱藻朝奉郎尙書考功員外郎章森承議郎守  
尙書左司員外郎王信奉議郎直祕閣兩浙路轉運  
判官耿秉朝散郎尙書刑部員外郎吳宗旦奉議郎

兩浙轉運司主管文字丁朝佐儒林郎監行在省倉  
門周震來等謹以清酌庶羞之奠致祭于侍講直院  
中書舍人崔公之靈惟公學以緝成文由體工各卿  
延譽聲聞九重發蹟冊府攝承玉堂朝無近比公實  
濫觴編摩著庭經筵省戶恩光燁煜重印疊組若時  
司成領袖二學臺萊蔚茂繁其先覺拜命云初時則  
強仕聞道吾前云胡計齒迺躋掖垣迺正寓直金華  
勸講亦座重席坦明之制方駕常揚誦說之偉褚馬  
鴈行停涵聿深廣厚雄渾有燁其華益殖其根紫樞  
黃閣緩步徐行豈其一疾鏟采淪精疇昔伯仲聯擢

儒科來遊帝廷袂屬肩摩自伯之徂淚睫未乾復此  
淪落行路辛酸嗚呼哀哉天恡靈奇文能窮人抽深  
扶密鬼神所嗔自古已然夫復何言猶有副墨藏之  
名山公亮等託契年籍竝遊朝序情好稠重言言語  
語自聞稔疾接踵門牆進莫我與敢懷煥涼卷衣雖  
復何有何無于以寄哀惟蕭及壺

陳司理

維淳熙九年歲次壬寅五月丙午朔十三日迪功郎  
臨安府左司理參軍陳之芳謹以清酌庶羞之奠致  
祭于侍講直院中書舍人崔公之靈惟公茂德指紳

是矜發策決科棠棣聯登宦達烜赫罔麗青蠅帝眷  
有加掌制西清爲舍人樣顧問談經黑頭逝水邦國  
殄驚嗚呼痛哉友于愛重譽著鄉評接翼翱翔倏爾  
飄零如賓偕老黃鵠歌升呱呱而泣其何忍聽却藥  
屏愛一練青青頌辭無愧彈指生平嗚呼痛哉之芳  
溫巾司獄三見周星忝辱葭莩獲拜典刑門牆相望  
輿進情傾吁嗟漏盡九原莫興敬致薄奠涕洒銘旌

陳教授

維淳熙九年歲次壬寅五月丙午朔十九日戊子親  
未從政郎新溫州州學教授陳紳謹以清酌庶羞之

奠敬祭于侍講直院中書舍人崔公姨丈之靈嗚呼  
天地英靈秀淑之氣造化所慳多取爲忌難弟難兄  
萃于公門接翼儒科粲然而文公之辭章尤爲卓犖  
猛虎長蛇赤手捕縛渾然天成不露圻塲帝曰來歸  
置之玉堂視草代言實惟汝長罔俾常揚專美有唐  
夜半席前論天下事昌言讜辭無所顧忌如木投石  
仰當帝意鳳閣西清極儒者榮步武駸駸輔弼疑丞  
胡然半途而嗇其齡嗚呼哀哉富貴無聞又焉用久  
朝而聞道夕死不朽公之雅歌藏在樂官公之誥詔  
百代不刊愛君憂國無負所學易簣從容何愧何忤

嗚呼哀哉紳之荷公親愛是敦分則友胥義同弟昌  
教我掖我繫公之恩吾喪吾室公書來唁如拯溺焚  
開釋繼繼公之喪兄義篤友于我慰以書公其少紓  
庚子之春摻秋執別尺書勞苦間歲闊絕方期來還  
再侍笑言嗟嗟訃音忽墮目前嗚呼身世空華俛仰  
今昔孰云一朝幽明長有隔肴盈缶有酒盈觴慟哭  
公堂魂兮不忘

挽章

朝奉郎新除起居舍人兼國史院編修官兼  
權直學士院趙彥中

直上青霄早秋翎插健雕心源九雲夢筆陣幾嫵姚  
視草含英鳳封章落貴貂身前茂陵藁及謁漢皇朝

君爲繼論  
甫及奏御

仙院分宵直書庭接翼翔情忘海夫臭語借令君香  
君頃因夜對語  
及不肖姓名壯髮猶藏葆生芻已眞觴修文平日  
事地下亦爲郎

贊皇李

處全

雅望高簪履昌言動冕旒五花方判事萬戶合封侯  
未換黃金帶俄成白玉樓匆匆大槐國起滅等浮漚  
桂籍聯升望舜裳香飄折檻馥天光我心但媿蒹葭  
倚衆目爭觀鴻鴈鵠策足華涂欣袞袞致身台路失  
堂堂併看雙璧埋黃壤一慟風前淚數行

朝奉大夫守宗正少卿兼 太子侍講史

彌大

在昔誇三喜于今萃一門周還陪帝學終始代王言  
晉擢傾人望規陳悉治原彼蒼無處問才大合調元  
憶昨登瀛日相親意最深耽書加我瘳體國見君心



遽就黃梁夢空遺丹戾箴堂堂那復有哀涕泣霑襟

寄理宣教郎國子監博士李 祥

聲聞江淮滿文章燕許期華棣聯秀萼椿老見芳枝  
璧水風流盡金鑾眷遇私哀榮極閔飾埋玉更成悲  
宣教郎元詳定一司 勅令所刪定官方

有開

士有千齡遇名傳百世榮文章聲權直淮海出儒英  
紫禁煙花遽黃麻黼黻明方深丹戾眷痛惜掩佳城  
久託奎躔照仍從璧水遊沖襟粲星斗高議炳陽秋  
磊落觀材傑凋零悼世浮傳家真驥子努力紹先猷

承議郎直徽猷閣權知平江軍府事耿 秉  
足躡脩門甫十年惟餘篇翰富流傳橫經趣得陳編  
外草制雄誇落筆先爭美冰銜塵不染忍觀華□□  
隨遷忠翰丹宸箴猶在一鑑云亡共黯然

朝散大夫樞密院檢詳諸房文字兼樞密副  
都承旨陳 蒼舒

早結淵衷眷英名擅四方獻箴誠剴切婁諫極忠良  
勸講黃金殿修辭白玉堂簪紳歆盛美何事遽云亡  
昔宰金淵日獲從二陸游同朝深自喜投袂意相稠  
伯氏方驚歿公平遽若休佳城知有日老淚灑西州

倣漢魏至唐爲饒歌鼓吹曲十二篇以述 祖宗功德之盛見稱於時又以司馬公資治通鑑於治亂得失忠邪善惡有所未論者凡一君之後爲總說一代之末爲統論成六十卷號通鑑要覽皆以奏御而上命公更定呂祖謙所編文鑑中羣臣奏議其增損去留率有意義有文集三十卷內外制藁二十三卷奏議總要五卷制海十編鑑韻五編藏于家官自朝奉大夫贈中大夫年僅四十有四母陶氏贈安人娶將作少監錢俛之女封安人一男子端學十一歲四女子長及笄餘尚幼方公兄之沒也公悼之甚□□

已之恩□與其姪□錢夫人遂拾遺澤以成公之□  
故其葬也士友相率爲之請銘是重可哀已銘曰  
惟文之修言乃立學而能通濟以識細焉歌詩□□  
冊皇猷帝謨資潤色猗嗟崔公學允力辰哉遇聖□  
斯赫玉堂增官首其直溫然珪璋蘊其德從橫詞林  
論皆益帝眷之隆且丞弼年方剛強衆所惜生淮之  
孺葬于溧

此文當是舍人墓誌原本殘闕第有一頁而字  
亦多刊今無別本可校補姑存之於後天瀑識

右宋槧玉堂類藁二十卷西垣類藁二卷南宋崔敦詩所著附錄一卷乃係其歷官制誥及祭文挽詞按宋史敦詩無傳據姓譜及其墓銘敦詩字大雅常熟人紹興進士官至中書舍人性謹厚知大體所陳劄切爲孝宗所器許有文集二十卷奏議五卷制藁二十二卷又著制海監韻等書就司馬公通鑑舉論每代得失正邪成要覽六十卷以奏御帝命更定呂東萊文鑑其增損去留率有意義又按宋藝文志所載周必大玉堂西垣二藁二十二卷當卽崔此藁而脫脫誤以爲周也其他諸家書目皆不著錄獨葉盛列

之策竹堂目錄則知明氏中藥其書猶存也至於乾隆四庫目錄不復及則或者已亡矣此本古色鬱然其爲當初原板無可疑焉首有金澤文庫印記上杉氏舊藏也凡宋刻傳者明清猶爲罕邁況於萬里之外其可不寶愛乎詳其編纂不過制誥口宜批答及青詞致語等蓋所謂制彙二十二卷者歟其他奏議文集知大體而剴切者今皆不可見爲可惜已栗山柴邦彥跋

曩者柴彥輔獲宋槧玉堂類藁與余商推爲之跋余時借觀將欲活字印出彥輔亦慫慂之今

刷印方訖則彥輔逝矣不及見也仍附柴跋併  
志其憾丁卯十又二月中澣八日天瀑山人識

崔舍人西垣類藁卷第一

王希呂知紹興府

稽山奧壤浙水各邦地接浩繁夙倚藩維之重民罹  
菑害今勤憂顧之懷具官王希呂識慮疏通器資強  
毅純誠天至獨開忠義之圖俊辯風馳自詭功名之  
會寢發舒於素蘊遂登冠於近聯久歷歲陰益承恩  
遇爰念近畿之地方深艱食之虞展閣貸捐悉無遺  
力矜存惠養正在得人宜深體於焦勞尚恪勤於綏  
撫惟詳密可以究民隱惟寬和可以盡下情佇輯顯  
庸卽圖懋賞可



鄭丙除吏部尚書

天官任重綜會羣才常伯班高密鄰二府朕深厭容  
容之弊樂聞諤諤之風儀圖正臣領袖法從具官鄭  
丙志剛而弗惑學博而有原正色不回凜凜端朝之  
望至誠無隱拳拳迄膝之陳察其特立而獨行常以  
深嘉而屢嘆眷言銓選宜屬老成惟亮直必不以法  
而從人惟公明必不以權而付吏揚清激濁方觀綱  
紀之張陳善閉邪更賴謀猷之告勉堅素守益劬遠

朕稽古訓以建官酌公言而立政稟承出於西省旣  
克謹於幾微之先審閱付於東臺又相濟以可否之  
論夙重茲任亶惟其賢具官施師黠學造深淳器函  
夷雅清規亮節凜松栢之後彫厚實美各顯圭璋之  
特達自躋榮於禁路卽演潤於詞垣高文奉經術之  
華宏論達國家之體旣淹歲籥宜進位班庶事施置  
有未便於民羣才選除有未孚於衆爾悉予告予皆  
爾從當消患於冥冥豈矜功於赫赫勉殫忠藎茂對  
亨嘉可

木待問除中書舍人

政令出於中書訓辭行於內史必識通今事乃能裁  
若否之宜必文追古風方足擅坦明之制得於已試  
命以爲真具官木待問智識澹長風規邃遠英聲茂  
實早嚮藝苑之華安步徐行徧極儒林之選曩記言  
於左陛旋攝直於西垣文詞鼓天下之心議論發胸  
中之蘊宜從輿望遂正近聯四禁行書方重高華之  
地五花判事益觀潤色之長可

儒林郎劉植降一官

國家法令昭若日星有官君子尤當循守爾乃戾法  
以徇其私罰可逃乎可

從義郎孫惠義降一官

縣令於民最親爾居其官敢肆殘酷不有顯罰曷厲其餘可

芮輝兼侍讀

朕泛觀載籍夷考名臣越在李唐深嘉陸贄雖忠規挺挺凜後世之未亡顧諫䟽拳拳慨當時之不遇肆疇近列俾闡遺文固將廣一己之聰明抑亦發九原之亮直具官芮輝性資宏毅德宇淵純奧學英詞蚤著士林之譽昌言正論晚高禁路之聲宜從清燕之遊用究前賢之蘊摘其精要爲我指陳金必賴於良

工始得範模之正方雖傳於往古固多藥石之良可

武功大夫謝純孝降三官放罷

廉恥國之所甚重貪污法之所不容爾資稟凡庸弗  
紹厥美襲其宿過實在右班位序高華不爲不遇緝  
治器械朕所注懷俾爾典臨略無勞効而敢黷貨冒  
沒肆其豕心徹于聽聞何敢佚罰雖鑄累秩尚屈爰  
章宜知寬恩痛自懲省可

韋訊致仕

朕猥侍親庭優隆威睨望濯龍之車馬稍闕冲規挂  
神武之衣冠忽披忱請重違雅志亟下褒書具官韋

訊制行端良稟資和裕高門有奕靡矜世胄之華令  
德無疵自迪儒風之美比聞假告方切眷懷尚須勿  
藥之期遽上告歸之奏念其確至昇以休閒簪紱趨  
朝雖嘆儀刑之遠丘樊佚老終膺福祉之長可

張顯功轉防禦使

帶千將佩弧矢入侍出從密近左右其爲恩渥不同  
常倫于解其職又增秩以寵之用故事也爾恭恣敏  
給擢在軒墀左弭右韃周旋惟謹茲出分於戎務爰  
陞寄於軍防尚服龍光益圖報効可

秉義郎魯安時妄陳利害降雨官

西江雜錄 卷一 四  
朕於聽言雖草茅之狂未嘗不容也爾詭辭汗漫略  
無端倪不黜得乎可

韋訊贈節度使

聯華四姓望尤重於親賢流寵九原義當隆於恩禮  
莫追遺範爰錫愍章具官韋訊德宇靖深器資溫裕  
雍容文藝恂恂樂善之風蹈履中和疊疊勞謙之度  
還觀懿行盡享遐齡方從解綬之高遽歎移舟之遠  
臨朝興愴念戚隣之彫零渙爵疏恩飭邦彝之優厚  
宜畀建旄之寵俾爲告第之光慰爾杳冥寄予哀惻  
尙祇徽典永燕幽宮可

木待問磨勘轉中大夫制

聯榮兩禁禮優入侍之臣會課三銓法著陟明之典  
肆條伐緒爰錫恩書具官木待問德宇凝深詞華雅  
健代言西掖旣全潤飾之功論道東官更廣見聞之  
正寵榮方集聲問采高稽周官大計之書躋漢爵議  
臣之序秩登祿富當思報稱之圖言聽計從正賴忠  
嘉之益可

皇甫倬降官吉州居住制

程尉馭下必先軍簿之明李牧饗師亦取市租之富  
爾素稱勇節自奮戎行蚤受簡知荐分委寄旣不能



昭明兵律俾以肅齊又不能經理軍須底于辦給空  
閱歲年之久略無績効之聞茲覽人言可逃國典宜  
併錫於官秩仍就謫於方州法有至公固不渝於金  
石才無終棄尚可効於桑榆可

趙善俊降直徽猷閣制

朕審重名器未嘗輕假爾畏妄人之利口溢薦黜之  
虛辭欲以市恩忍於罔上任方面者顧如是乎降職  
示懲尚爲寬典宜思循省毋重悔尤可

孔摺降兩官制

孔子曰節用而愛人未有用節而人不蒙其愛也爾

爲聖人後曾不知此聊從薄罰降秩罷州歸思聖言  
尚亦知耻可

牟天麟降一官放罷

小寇跳梁一方被害爾爲郡貳義當首公避事偷安  
茲復何賴免官降秩庸戒後來可

王丞相初除封贈三代

曾祖贈太師

朕卜選真賢登進宰位乃一德一心勸相我國家則  
亦惟念流澤之由褒大顯榮上及三世蓋尊尊者□  
重善善者慶長古之道也具官某體仁蹈義飭于□

躬錫祚流光燕及乃後今予命以維垣一品之秩□  
貴于廟豈惟示吾尊異元臣之心抑亦彰未慶源深  
長流衍未艾潛德闡耀發見有時以勸天下之爲善  
與臣子之顯親一舉而數美備豈不休哉可

曾祖母贈楚國夫人

朕惟國家崇厚士夫自通籍以上皆得寵綏其先其  
位愈高其體愈隆推而上之至于相臣遂及三世而  
命爵品秩又皆加異凡以禮之宜與稱所當然也具  
位某氏柔明端靖蹈履令規仁慈惠祥開相後裔乃  
眷元輔是惟聞孫今進登厥位而不推錫恩寵以貴

于幽局何以昭積善之報而慰慕遠之心哉追錫命  
書改封全楚庶其如在尚克有榮可

祖封魯國公

積厚者光遠施隆者享豐固有高門而俟軒車乃若  
植槐而須袞繡修德在已責報彼天殆厥應之信然  
何可必之如此具官某才周世用行迪天常秉節自  
彊蚤共高於問望韜光不曜晚弗見於功名委祉後  
昆調元台路肆於柄任之始念爾陰功之由詔爵追  
榮已極上公之貴按圖易壤更新東魯之封尚體密  
章永寧泉室可

祖母贈魯國夫人

爵視德以俱崇禮隨情而始稱眷惟元輔方懋遠圖  
探尊祖之心既加崇於廟室推齊體之義爰竝下於  
恩書具位某氏秉則淳和凝資冲靜柔風懿範既克  
相於有家厚德陰功乃大昌於厥後屬聞孫之登任  
知慶澤之由來位正小君已疏榮於象服封開大國  
仍易地於龜蒙尙想管魂克祇茂典可

父封慶國公

臣子之道忠孝而已得時行道既盡忠於國原始追  
遠必思遠其親朕既歷選于衆得天下之賢而命之

輔相又推其欲報之心不愛高官重爵以崇寵其先  
豈非仁之至而義之盡者歟具官某宅心澹夷制行  
中正蹈履仁義弗昌于時卷藏材猷全畀其子今吾  
丞相佐佑厥辟勤勞國家則惟爾義方之教用能銜  
訓象美底其忠嘉肆於柄任之始命以全國美封告  
于廟室豈惟發揚潛德之光抑亦褒大慶祥之自沒  
而不朽尚榮享爲可

母封吳國太夫人

朕覽魯侯燕喜之章想其雍雍怡怡內外和懌固常  
三復興嘆以爲人臣之遇旣致位於顯崇復榮親於

孝養信天下之至樂無以易也今吾丞相寅亮元化  
辨章萬微退食委蛇有母而壽茲非朕心之寵嘉乎  
具位某氏生稟柔則動合令儀信順靖恭稱內助之  
正慈和嚴翼具聖善之資果見嗣賢是陟相位肆稽  
彝典爰易名封且袞繡拜前簪紱滿後俾夫族黨胥  
慶知天報之豐邦國具膺幸親榮之盛則惟爾訓慈  
之厚豈不顯哉可

妻封越國夫人

朕觀召南之詩知夫賢人君子身有爵位上宣勞於  
王室下施澤於國人其所以夙夜匪懈克底成績則

亦惟內助之賢乃有濟也今予登用一相儀刑列辟  
肆推伉儷之體併錫褒崇之章豈非此序具位某氏  
懿和稟質溫靖成儀嬪于德人動以禮法爰舉典章  
之舊俾新脂澤之封尚服寵榮益綏福履可

趙介降兩官

朕保民如保赤子惟恐傷之爾受命典州宜知德意  
乃剝民以資妄用不黜可乎降秩兩階尚爲輕典可  
曾守約降兩官放罷

朕甚惡將帥剝下以自豐爾甫分戎寄已肆貪心降  
秩免官尚爲寬典可



張士份降一資

賦有經常一豪過之卽傷吾民爾撫字無方刻剝是務閱實以聞聊用薄罰可

韋潛心降兩資放罷

周官以豬蓄水以澮寫水凡蓄水者正以待旱而灌輸也爾昧於適宜幾以召亂繆戾如此蒙黜何尤可

李椿落致仕除顯謨閣待制知潭州

朕厲精政理遴選帥藩念南紀之上游孰寬予顧訪東山之故老強爲我興具官某學造誠明智周貫變端純簡重曾不越於宮庭清粹澹夷亦無窺其涯涘

曩綴甘泉之從歷宣外屏之勞旋據禮以告歸迄挂  
冠而厲俗眷言巨鎮夙重長沙藩翰須賢方當宁周  
詢之日丘園亢志豈長才高臥之時宜下垂車卽紆  
懷綬仍念分符於遠服更令峻職於西清惟風俗周  
知當有爲而人服惟吏民素習固不令而化行尚底  
政成更勤猷告可

江溥除直祕閣

西崑冊府東觀道山凡預選掄莫非俊乂至於官稱  
論譔地重高華朕今以清名顯職皆爲勸功之具非  
績用卓然協于輿論不以輕畀也爾素推才望嘗任

臺綱不避當塗無爽正論今以使者節持平一道乃能以其餘力審覈邊防徹于聽聞良所嘉賞且身行重湖風波之外各繫蓬萊雲氣之間吏民觀望不亦美乎宜思忠勤益務報稱可

沈作賓再任評事

廷尉有平朕所遴擇凡其以稱任聞者不遽易之也爾茂職有年議法無枉爰俾因任尚究所長可

潘師旦罷開職轉一官

帝宸二開職近地親肆推憇恩率用優比爾久恭乃事今解厥司贊言勞勤宜有褒異且一官之賞朕亦

甚吝毋曰持例可得而不思報哉可

吏部員外郎蘇詡陞郎中

文昌諸郎俱世高選校勞定位纖悉不差蓋重其任也爾各臣之後詳練靖嘉列屬三銓甄序惟允今推次閤閱宜在正員之序不旣寵乎位班雖升職任不易夙夜匪懈迄究爾庸可

何杞特降兩官

監臨虧失國有彝章爾培削紛紜幾以逃責獨不念無辜之民乎卽臣以聞不可無罰可

張子顏降敷文閣直學士提舉江州太平興

國官

朕厲精政體勤恤黎元比聞近輔之邦適與順成之望亟下命令悉捐賦輸宜吾德心屬在帥守具官某蚤登禁近屢守藩方念其踐歷之多寄以撫綏之任方矜存流冗屢頒漢詔之寬乃督迫催科靡念越人之瘠屬披臺劾已釋郡章宜降職於清班俾奉祠於外館尚思前失益勉後圖可

內侍寄資武功大夫張安祚寄資武義大夫  
謝仔與轉歸吏部

內侍之官秩至東班供奉則有寄資逮歸銓曹乃昇

外任此舊典也爾服勞親近厲志端勤既躋官省之  
司宜正武階之秩雖循常比實出殊私且恭則寡過  
密則遠嫌可不勉哉可

宇文紹奕叙官

國家黜幽甄叙有法未嘗以一肯棄材也爾向坐簡  
劾既閱歲年應于常科還爾舊物盍思所以報此哉  
可

廖遂特降一官

搢紳庸行無越廉隅審如章聞爾何甚已尙緣去斥  
寧不究窮錮官一階當識寬宥可

楊丙降一資放罷

職爲司屬奉教令趨期會宜也爾緩不處又以計去  
寧無責乎可

崔舍人西垣類藁卷第一

崔舍人西垣類藁卷第二

劉堯咨該人使到闕應奉十番特與遙郡上  
轉行一官

朱華上閣位序高榮凡列職其間積其伐緒皆有以  
優異之示厚恩也爾奮由將閥進服宸庭歲時旣多  
勞績是著今俾疊上二秩之賞陞列遙團不旣寵乎  
恭以承事恪以守業率履不懈圖究爾能可

孟俊特降一官

東南諸將蕃布軀分鈐制之官所望忠實爾紀律素  
施廉級已夷肆爲詭辭溢見章奏鑄官一秩可不戒



乎可

魏詠降雨資放罷

穀粟無征法也况當救荒之日乎爾背違德意苛擾商舟免官黜資聊示薄責可

趙粹中落職

百年去殺政常出於寬平三宥致刑事當先於清審具官某頃由法從俾典方州銳陳郵置之姦顯正市閔之戮旣更累歲乃露幽寃五聽有孚何偶乖於克允一成不變遂濫及於無辜莫追祝網之寬尚想沈泉之痛究觀厥實駭動予衷死者不生懲之奚益姑

盡鐫於乃職庶具警於攸司祇服恩容勉圖報効可

鄧從訓職事有勞特與遙郡上轉行一官

朕欽修孝養祇奉慈庭凡給侍左右苟有勞能未嘗不優賞而昭勸之也具官某愿茲飭躬恭恪承事旣乃歲籥良協眷懷宜進序於遙團用增華於內列維忠維勤夙夜不解圖所以稱朕意者可不勉哉可

雷世方降一官

將帥之道維公與廉乃可服衆自昔所記市租輸莫府賞賜入軍中凡皆一毫不私也況敢奢侈以自奉乎爾用公財造私舟得於風聞事有實狀鐫官一等

聊警乃心尚知戒哉可

王孝通特降一資

綱運之事屬之搢紳猶有以侵移聞者尚誰使乎黜官一資聊示薄罰可

張適朱傑各特降兩官放罷

黎民荐飢荒政畢舉一時乏事之吏咸用峻典朕爲赤子計者重也爾等各負曠責具形劾章鵠秩免官理不容已可

辛棄疾落職罷新任

淫風殉貨義存商訓之明酷吏知名事匪漢朝之美

豈意公平之世乃聞殘黷之稱罪旣發舒埋難容貸  
爾乘時自奮慕義來歸固嘗推以誠心亦旣委之方  
面曾微報効遽暴過愆肆厥貪求指公財爲囊橐敢  
於誅艾視赤子猶草菅憑陵上司締結同類憤形中  
外之士怨積江湖之民方廣賂遺庶消譏議負予及  
此爲爾悵然尚念間關向舊之初心迄用平恕隆寬  
之中典悉鑄祕職併解新官宜訟前非益圖後効可  
錢愷守本官致仕

朕惟行尊賢穆恩厚昭陵舊館淒涼悵穠華之已遠  
高閔赫奕望喬木之猶存肆乃後人見茲耆老□□

某賦資淳壹秉誼直溫習見稔聞多前人之風度侃  
言循行守君子之宮庭方圖畀於恩章遽願還於官  
政抱誠既切抗志莫回沁水名園應動襟懷之遠都  
門祖帳遂全名節之高勉服寵光茂終慶譽可

薛舜臣特降一資

刑獄朕所甚重爾爲縣令荒怠厥事乃使狴牢之內  
有死於淫酷者一資之黜豈足償寃當體寬容尚知  
愧畏可

錢愷贈節度使

朕敦厚風化優崇族親角東路之巾甫遂垂車之志

薄西山之景遽聞易簀之言具官某風矩詳華才資清邁訪建武功臣之世盛矣無窮閱長安戚里之家歸然獨在尚須耆艾足寄典刑駭遺書之上聞悼故老之凋盡念此感慨優其寵榮絳節先塗莫致生前之遇篆章書柩聊爲沒後之光諒爾沉冥知予傷惻可

魏庭瓚董壽祺應奉金國人使到闕及一十番輿轉一官

周旋軒墀贊相賓客其責皆非輕也爾承事恪勤詔禮安裕閱歲旣久積勞當遷一官之賞尚承敬哉可

楊思濟特降一官

小民乘饑譁聚有訴鎮以安靜徐爲辯詳宜也爾惑亂失措可不責乎可

王定國特降一官

天下之士會於銓曹里居官歷必有實乃可攷也爾遠通戶籍私囑吏胥閱實以聞不可無罰可

崔亮捕賊沉師等陣亡特與贈四官

共武之臣所資於忠力死綏之節當厚於恩章爾策略敏明器懷沉銳久領師于之寄適承名捕之書匹馬直趨庶成功於必取妖狐匿發偶殞命於不虞莫

歸先軫之元徒負班超之願優加卹典驟越羹章尙  
發予懷慰忠魂於地下亦令爾士激義氣於行間可

耿秉降一官

朕憂民之飢由已飢之凡捐財發粟皆以拯民也爾  
夙負材稱尤高郡選適因匱乏遂有轉移雖心乎奉  
公殆與朕本指良異可無責乎尚緣荒政已著勞庸  
薄罰示懲餘毋胥効可

趙汝愚回授贈母

仁治之朝凡以親請者朕未嘗不致其厚也爾子願  
馳一秩追賁九原則其賢亦可知矣爰頒明綸俾遂



素志幽爽未泯得無慰哉可

劉焯落集英殿修撰

朝廷清明公道昭達威用峻罰酌從輿言爾蚤列雋  
英素高議論出於選擢付以蕃宣今言者歷數過愆  
置在窮奇之目鋪觀反復迹狀燦然噫使朕賞不當  
功罰不當罪皆爾私意變亂所致可不責耶盡鐫寵  
名少謝衆志祇予寬典尚省厥尤可

廖遵降一資

外臺之臣寄朕耳目所以取成而制賞罰者也爾前  
使遐方嘗上重劾逮茲覆視見乃橫誣噫使予施峻

罰於無辜抑何誤耶降秩一階尚爲寬典維明克審  
則免後尤可

曾寘降一官

王畿之內纖悉必聞爾爲小吏奉職不謹閱實有狀  
聊用薄罰可

趙伯驩落階官

右班至正任恩禮重矣朕未嘗輕以假人也比承慈  
訓褒厚宗盟乃下贊書用成德美爾稟資和裕履行  
端純總近甸之軍符司外臺之臬事久于任使見乃  
勤勞茲用推錫恩章進于扞防之秩不旣顯哉服命

數之殊常思寵名之長守惟謙惟畏是稱所蒙可

趙不恭贈左領軍衛將軍

朕惟祖宗本支蕃衍百世間聞淪喪有足悼傷不有  
厚典何以寄予恤乎爾邦族之良淳和孝友曷啻其  
子乃弗永年朕用不釋于懷命以領衛之秩賁于九  
原哀榮有終恩義俱盡尚有知者亦克享哉可

林和林賜各轉一官

頑兇輕命出沒溟波殘擾善良寢以稽捕爾等履危  
蹈險禽獲無遺顯伏重刑海氣明靜咸進官秩尚知  
報哉可

趙不讜換率府副率

朕優崇近親敦厚美俗間者下升等之詔所以壯宗盟而華班序也爾端純靖共蹈履無失宜易環列俾參昕朝尚承敬哉可

張子震補承信郎

內省去職聽奏未仕者二人非舊制也用是官爾宜敬以承可

姜棧應奉人使到闕及一十番與轉一官

端宸二閣右列高選也爾敏給靖恭祗事維久贊道賓客禮無闕違命進官秩尚思報哉可

杜沂除閤門祇候

朕惟昭憲皇后之家寢鬱弗昌明發有懷爲之惕然  
爾純謹和雅自有前光宸閣清華命以庀職豈不宜  
哉可

王珪降一資

郡獄有冤至於濫殺究其蔽斷初不至斯固有任其  
咎者矣爾得無薄罰乎可

施師點奉使回程特轉一官

禮樂光華方被張旌之遣山川跋履又觀濡轡之旋  
具官某德器純深才資高邁駕一乘之傳不憚于行

道二國之言罔違於禮肆疇褒典俾進文階維關河  
感綦之情暨原隰咨詢之實尚殫猷告茂對恩光可

鄒詡副使回程特轉一官

玉帛往來內外和樂于時拜五善之詩奉萬里之使  
亦人臣之至榮也爾奮迹巍科典教右學才業之茂  
有達朕聞選以輔行迄於成禮勞還進秩尚承敬哉  
可

張大聲孫孜特降一資

朕救災卹患所賴羣力今使者上不職之吏宜有薄  
罰可

范珣武劉銑陳拱夏之禮各降兩官

羽林之兵有干等級是必紀律素施恩威不孚而致此也豈特逐捕弗謹爲罪乎偏裨而下降黜以差尚警其餘善撫吾士可

張璠降一官放罷

畔官離次國典有常爾爲貳郡宜知職守乃翩然自如肆已之便尚有法乎可

張偉降兩官

一夫肆兇干犯軍律玩施不謹宜有自來凡預典臨皆被黜罰爾職雖下可得免乎可

馬希古趙友諒各轉一官

古者醫政視勞制食所以引人之進於藝也爾執伎有稱服勤維久肆稽功緒俾陞官階維謹以恪尚益勉哉可

趙鞏施柏各轉一資

近臣出疆體優事重凡其選置行與居者皆被勞還之賞不旣寵乎可

朱熙績降一資

鄉郡有飢義當救恤乘時邀利是誠何心雖爾不足以責此違令鼓衆可無罰乎可



郭杲轉遙刺

刺史古官也漢制秩二千石宣詔牧民乃古方伯之任今列于勇爵號爲顯崇雖在遙寄亦不輕予爾分提戎戍安鎮邊陲攝領帥藩積更歲籥疇其勞効錫以寵光衛上盡忠撫士盡愛圖所報稱可不勉哉可

李師信補挈壺正

疇人之官序于爵品爾服初命宜謹厥司可

楊璽李溫各轉一官

祇奉賓客咸有優恩所以勸人之謹於事也爾以積勞應于遷令尚敬承哉可

王蘭兼崇政殿說書

朕從容清燕延見儒英講道先聖之遺書誦說前賢  
之名論信天下之樂無以加也自非直亮多聞古之  
所謂三益者尚誰居乎爾氣節高邁學問淵純中立  
獨行無所回曲擢在臺察斷由朕心風稜言言不善  
知懼今引以自近列于講席豈徒望爾於分章析句  
之間哉啓告利病分別正邪知無不言是乃報稱可

韓敏中降一官

天下財賦灌輸中都今民曹上稽違之狀罰難但已  
綱官示責尚敬承哉可

曾帑降兩資

縣有戎兵將以警盜爾爲令亡狀漫不知卹何以責其力乎可

趙詠之回授封母

朕以孝理天下凡搢紳之以親請者未嘗不曲從其欲也爾子願勉已秩圖報母慈推錫命封貴于泉室可

崔舍人西垣類藁卷第二